

- केन्द्र सरकार राष्ट्रीय क्रिटिकल खनिज मिशन ने मंजूरी दीनी।
- विधानसभा अध्यक्ष वासुदेव देवनानी सगळी सियासी पार्टियां ऊं सदन रो कामकाज तौर-तरीका ऊं चलावण मांय मदद करण री अपील कीनी।
- राज्य सरकार खाद्य सुरक्षा योजना मांय नुवा नाम जोड़बा सारू पोर्टल ने और सुविधाजनक बनायो।
- बीटिंग रिट्रीट रा आयोजन सागे गणतंत्र दिवस समारोह पूरो व्ह्यो।

000

सरकार राष्ट्रीय क्रिटिकल खनिज मिशन ने मंजूरी दे दीनी है। सूचना अर प्रसारण मंत्री अश्विनी वैष्णव आज नई दिल्ली मांय आ जाणकारी दीनी। वे बतायो के हरित प्रौद्योगिकी ने बधावो देवण सारू जरूरी खास खनिज संसाधनां बाबत लचीली मूल्य श्रृंखला बणावण रो फैसलो ई करी ज्यो है। वे खबरनवीसां ने बतायो के खास खनिजां री खोज, खनिज ब्लॉक हासिल करण अर परदेस ऊं खनिज मंगावणो कम करण मांय देश रो बूतो बधावण रा मकसद ऊं मिशन ने मंजूरी दीरीजी है।

सरकार गन्ना फीडस्टॉक ऊं इथेनॉल खरीद रा मोल ने ई मंजूरी दे दीनी।

000

विधानसभा अध्यक्ष वासुदेव देवनानी सगळी सियासी पार्टियां रा नेतावां ऊं सदन तौर-तरीका ऊं चलावण मांय मदद करण री अपील कीनी है। वे आज सगळी पार्टियां री मीटिंग मांय बोल रह्या हा। स्पीकर कह्यो के विधानसभा राज्य री आठ करोड़ जनता री नुमाइन्दगी करे है अर जनता रा नुमाइन्दां ने लोगां री उम्मीदां रे मुजब व्यवहार करणो चाहिजे। मीटिंग मांय मुख्यमंत्री भजनलाल शर्मा ई सिरकत कीनी। ई पाछे वे विधानसभा रा नुवा परिवेश ने निरख्यो। मुख्यमंत्री विधानसभा मांय डिजिटलीकरण समेत दूजा नवाचारां री सराहवणा ई कीनी। ई मौके विधानसभा अध्यक्ष वासुदेव देवनानी, विपख रा नेता टीकाराम जूली, संसदीय कार्यमंत्री जोगाराम पटेल, ऊर्जा राज्य मंत्री हीरालाल नागर, सरकारी मुख्य सचेतक जोगेश्वर गर्ग समेत न्यारी-न्यारी पार्टियां रा नेता मौजूद हा। मीटिंग पाछे खबरनवीसां सागे बातचीत करता थकां संसदीय कार्यमंत्री जोगाराम पटेल कह्यो के विपख जो मुद्दा पेश करेला, सरकार तथ्यां सागे वां रो जवाब देवेला।

सदन मांय विपख रा नेता टीकाराम जूली कह्यो के सदन चलावण मांय विपख पूरी मदद करेला।

मौजूदा विधानसभा रो तीजो सत्र 31 जनवरी ऊं सरू व्हेला।

000

राज्यपाल हरिभाऊ बागडे नौजवानां ऊं संस्कृति ने बचावण मांय योगदान देवण सारू कह्यो है। वे आज जयपुर रा राजभवन मांय राख्यी ज्या 16 वां आदिवासी युवा आदान प्रदान कार्यक्रम मांय बोल रह्या हा। श्री बागडे आदिवासी समाज ने जल, जंगल अर जमीन रा सांचा संरक्षक बताया। राज्यपाल झारखंड, छत्तीसगढ़ अर ओडिशा रा न्यारा-न्यारा हलकां ऊं आया नौजवानां ऊं बिरसा मुंडा, गोविंद गुरु अर काली बाई समेत न्यारी-न्यारी हस्तियां ऊं सीख लेवण री अपील कीनी।

000

राज्य मांय खाद्य सुरक्षा योजना रो फायदो लेवण सारू नुवा नाम जुड़वावण बाबत खाद्य सुरक्षा पोर्टल ने और साफगोई सागे सुविधाजनक बनायी ज्यो है। खाद्य अर नागरिक आपूर्ति मंत्री सुमित गोदारा बतायो के इण रो फायदो लेवण रा पात्र लोग खुद या ई-मित्र रे मार्फत अर्जी दे सके है।

000

राज्य सरकार हनुमानगढ़ जिला मांय संगरिया तहसील रा नौ गांवां रे अभावग्रस्त व्हेवण रा हुकम जारी कीना है। ओला पड़बा रे कारण उनाळू साखां मांय एक तिहाई ऊं बत्तो खराबो व्हेवण रे कारण काश्तकारां ने कृषि-आदान अनुदान वितरण बाबत अ हुकम दिया ज्या है। आपदा प्रबंधन, सहायता अर नागरिक सुरक्षा विभाग रा संयुक्त शासन सचिव भगवंत सिंह बतायो के हनुमानगढ़ जिला कलेक्टर री ओर ऊं फसल खराबा रा बारा मांय भेजी ज्यी गिरदावरी रपट रा आधार ऊं ओ फैसलो करी ज्यो है।

वित्तमंत्री निर्मला सीतारमण एक फरवरी ने माली साल 2025-26 रो केन्द्रीय बजट पेश करेला। जाणकारां अर जनता ने इण मांय विकास, नौकरी-धंधा अर माली प्रबन्धन माथे खास ध्यान देवण री आस है। प्रदेश मांय ई जनता अर न्यारा-न्यारा हलकां रा कारोबारियां मांय बजट रा बारा मांय उमाव है। वस्त्र नगरी रा नाम ऊं पिछाण्या जावण वाळा भीलवाड़ा रा कपड़ा कारोबारियां ने ई केन्द्रीय बजट ऊं केई उम्मीदां है। भीलवाड़ा टेक्सटाइल ट्रेड फेडरेशन रा उपाध्यक्ष प्रेम स्वरूप गर्ग बजट मांय भीलवाड़ा मांय टेक्सटाइल पार्क खोलण रा ऐलाण री आस जतायी।

000

बीटिंग रिट्रीट जळसा सागे गणतंत्र दिवस समारोह आज नई दिल्ली मांय पूरो व्ह्यो। विजय चौक माथे राखी ज्या जळसा मांय फौजी टुकडियां संगीत री धुनां सागे भांत-भांत रा आकार बणा र मन मोह लीनो। जळसा मांय राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेन्द्र मोदी, रक्षा मंत्री राजनाथ सिंह अर केई केंद्रीय मंत्री ई मौजूद रह्या।

000

प्रयागराज मांय चाल रह्या महाकुंभ मांय आज मौनी अमावस रे मौके चार करोड़ ऊं बत्ता जातरु संगम मांय पवित्र स्नान कीनो। ई सागे ई घाटां माथे अनुष्ठान अर पूजा-अर्चना करी ज्यी। दुनिया रो सब ऊं मोटो धार्मिक समागम 13 जनवरी ने सरु व्ह्यो हो। इण मांय पहलो अमृत स्नान 14 जनवरी ने संकरात रे मौके करी ज्यो हो। महाकुंभ मांय हाल ताई 24 करोड़ ऊं बत्ता जातरु पवित्र डुबकी लगा चुक्या है। ई बीचे रेलवे महाकुंभ सारु चलायी जा रही कुछ खास गाडियां रद्द करण रा बारा मांय सोशल मीडिया माथे चाल रही खबरां ने गलत बतायी है। आकाशवाणी समाचार सागे बातचीत करता थकां रेलवे बोर्ड मांय सूचना अर प्रसार रा कार्यकारी निदेशक दिलीप कुमार आं खबरां ने गलत बतायी। वे कह्यो के मौनी अमावस रे मौके जातरुआं री मोटी तादाद ने ध्यान राखता थकां रेलवे 370 ऊं बत्ती गाडियां चला रही है। ई बीचे महाकुंभ मांय संगम नोज माथे बीती रात भगदड़ रे कारण कुछ जातरुआं री मौत अर केई जातरुआं रे जख्मी व्हेवण री शंका है। राष्ट्रपति द्रौपदी मुर्मू हादसा ने दुखदायी बताता थकां मरण वाळां रा पिरवार वाळां रा प्रति संवेदना जतायी है। वे जख्मी लोगां रे बेगा ई ठीक व्हेवण री कामना कीनी। प्रधानमंत्री नरेन्द्र मोदी ई हादसा रे कारण मरण वाळां रा पिरवार वाळां रा प्रति दुख जतायो है। वे कह्यो के वठे रो प्रशासन पीडित लोगां री हर संभव मदद कर रह्यो है। राज्यपाल हरिभाऊ बागडे अर मुख्यमंत्री भजनलाल लाल शर्मा ई हादसा माथे दुख जतायो है।

000